

ZAKON
O IZMJENAMA I DOPUNAMA ZAKONA O OPĆIM USLOVIMA ZA
ISPORUKU ELEKTRIČNE ENERGIJE BRČKO DISTRIKTA BiH

Na osnovu člana 23 Statuta Brčko distrikta Bosne i Hercegovine («Službeni glasnik Brčko distrikta BiH» brojevi 1/00, 4/00, 7/04, 20/05 i 24/05) Skupština Brčko distrikta Bosne i Hercegovine na 22. sjednici održanoj 14. decembra 2005. godine, usvaja

ZAKON O IZMJENAMA I DOPUNAMA ZAKONA O OPĆIM USLOVIMA ZA ISPORUKU ELEKTRIČNE ENERGIJE BRČKO DISTRIKTA BiH

Član 1

U članu 3 dodaje se nova tačka 4 koja glasi:
“Novim kupcima električne energije u smislu ovog zakona, smatra se kupac čiji se objekat prvi put priključuje na elektroenergetsku mrežu isporučioaca, kao i kupac čiji je objekat bio isključen s elektroenergetske mreže duže od jedne godine.

Ne smatra se novim kupcem, u smislu ovoga zakona, kupac čiji je objekat bio priključen na elektroenergetsku mrežu isporučioaca, ako se taj objekat zamjenjuje novim, na istoj lokaciji”.

Član 2

Član 31 mijenja se i glasi:

“Izvođenje priključka (vanjskog i unutrašnjeg) na niskonaponsku mrežu kupac električne energije može povjeriti za to ovlaštenoj organizaciji, po uslovima koje odredi isporučilac.

Puštanje priključka pod napon vrši isključivo isporučilac električne energije, pod uslovima i na način koji su određeni ovim zakonom. Troškove priključka i puštanja pod napon snosi kupac električne energije.

Kupac je obavezan riješiti sve imovinskopravne odnose”.

Član 3

Član 39 mijenja se i glasi:

“Kupac je dužan brinuti se za održavanje unutrašnjeg priključka, instalacija i trošila. Kupac odgovara za ispravnost unutrašnjeg priključka, instalacije i trošila, kao i za štete koje prouzrokuje njihova neispravnost na postrojenjima isporučioaca i drugih kupaca.

Troškove održavanja unutrašnjeg priključka i mjernog mjesta snosi kupac, a održavanje može povjeriti isporučioacu ili drugom ovlaštenom izvođaču, uz obavezu nadzora isporučioaca.

O neispravnostima na unutrašnjem priključku kupac je obavezan obavijestiti isporučioaca.

Isporučilac je ovlašten vršiti kontrolu ispravnosti unutrašnjeg priključka”.

Član 4

Član 77 mijenja se i glasi:

“Klase tačnosti ugrađenih električnih brojila moraju biti:

a) za aktivnu energiju na niskom naponu gdje se potrošnja mjeri mjernim uređajima u direktnom spoju klase 2,0;

b) za aktivnu energiju na niskom naponu gdje se potrošnja mjeri mjernim uređajima u poluindirektnom spoju (preko strujnih mjernih transformatora):

- za brojila s ugrađenim pokazivačem vršnog opterećenja klase 1,0,
- za ostala brojila klase 2,0 ili 3,0;

c) za aktivnu energiju na visokom naponu gdje se potrošnja mjeri mjernim uređajima u indirektnom spoju (preko strujnih i naponskih transformatora):

- za potrošnju do 24 miliona kilovat-sati godišnje klase 1,0,
- za potrošnju preko 24 miliona kilovat-sati godišnje klase 0,5 ili bolje;

d) za reaktivnu energiju bez obzira na kojem je naponu i kakvom je spoju mjerenje izvedeno, klase 3,0”.

Član 5

Član 90 mijenja se i glasi:

“Obračun i fakturisanje isporučene električne energije vrši se u konvertibilnim markama (KM)”.

Član 6

U članu 93 stav 2 mijenja se i glasi:

“Pod danom nastanka obaveze plaćanja iz prethodnog stava, podrazumijeva se dan uručenja računa”.

Član 7

Iza člana 97 dodaje se novi član 97a, koji glasi:

“Ukoliko kupac ne izmiruje redovno svoje obaveze prema isporučiocu u pogledu plaćanja računa za isporučenu električnu energiju, isporučilac može uslovljavati kupcu postavljanje pretplatničkog brojila.

U tom slučaju, brojilo postavlja isporučilac, a troškove postavljanja i nabavke brojila snosi kupac”.

Član 8

U članu 109, tačka 2, pod b, stav 2, mijenja se i glasi:

“Obračunska snaga iz tačaka a i b množi se s mjesečnim radnim satima i to:

- za mjesec od 01. oktobra do 31. marta, 360 sati;
- za ostale mjesece, 200 sati”.

Član 9

Ovaj zakon stupa na snagu 8. (osmog) dana od dana objavljivanja u «Službenom glasniku Brčko distrikta BiH».

Bosna i Hercegovina
BRČKO DISTRIKT
BOSNE I HERCEGOVINE
SKUPŠTINA BRČKO DISTRIKTA

Босна и Херцеговина
БРЧКО ДИСТРИКТ
БОСНЕ И ХЕРЦЕГОВИНЕ
СКУПШТИНА БРЧКО ДИСТРИКТА

Broj: 0-02-022-364/05
Brčko, 14. decembar 2005. godine

PREDSJEDNIK
SKUPŠTINE BRČKO DISTRIKTA BiH

Prof. dr. Milan Tomić